

## Saisonrückblick 2008/2009 Damen2

So, ize isches sowit, „z’Dame 2 geit a Start“. Nachere intensive und herte Vorbereitig warte mir gspannt uf üse erscht Mätsch. Datum: 14. 10. 2008 / Ziit: 20.30h / Neuenegg → (Neuenegg wird üs no dür die ganzi Saison begleite, daderzue später). Auso, los geits. Nachemne herte Kampf hei mir üse erscht Mätsch 3:2 verlore. Mir hei enang agluegt und gseit, o.k. dr nächscht, mir hei ja schliesslech guet gspiut. Gopf... Mir hei üs doch so Müeh gä, supi trainiert, fröiid am Volley, i keis Loch gheit, üs guet verstange... ☺ u glich heimer d’Vorrundi nume mit 4 Pünkt chöne abschliesse!!  
Z’Hey-light vor Vorrundi isch dr Sieg gäg Münchebuchsee gsi, denä heimers gä... Grad 3:0 heimerse heigschickt. Das isch eifach nume „geil“ gsi. Gäuet Froue!

Nachere churze Wiehnachtspouse si mir id Rückrundi gstartet. Mir hei gwüsst, was uf üs wartet. Mir müesse am Schluss eifach ufem drittletschte Platz lande. Zur Ziit si mir 2 letscht. Fakt isch dr letscht stigt ab, u dr 2 letscht geit ändi März id Abstiegsspiu ui, ui, ui...!!

Mir hei hert kämpft, dr Mäsi het immer a üs gloubt und aues gmacht was ihm müglech isch. Wo mir gseh hei, dasses knapp wird, simer zäme ghocket u hei gluegt wie mir ändlech vo däm 2 letschte Platz wäg chöme... Neuenegg u mir hei üs am Schwanz vor Ranglichte geng wieder abgwächslet. Mir hei zum Glück näre Versterchig übercho. Z’Desi, d’Meret und d’Anita vom D1 si üs cho ushäufe. MERCI viu mau! Mir si sehr froh gsi, si hei üs sehr ungerstützt. So wies äbe nid hätt söue si, isches ufe letscht Mätsch drufab cho...  
Datum: 14. 03. 2009 / Ziit: 13.30h / Gägner Neuenegg! Auso jetzte Ladies vougas!! 12 Froue simer a däm Mätsch gsi u aues heimer gä, im Fäud, näbem Fäud, dr Mäsi het richtigi Wägli i Hauebode glofe! ☺ Ratz, Fatz isch das gange u de hei mir Neuenegg 3:0 gschlage gha, Juhuuuuuu, mir hei dr Ligaerhaut gschaft! Me het Steine, nei grad Feusblöck ghöre a Bode gheie, nachem Schlusspiff.

Mir hei nang näre wieder ahgluegt u gseit (Mir si di geilschte) → gäu Core? Völlig entspannt u locker hei mir näre no zwöi mau trainiert. Am 3. Apriu hei mir no äs Schlussässe bi Mäsi u Michi daheime, „mmmh Mexikanisch gits.“

Mir si gspannt was üs nächscht Saison für Usevorderige erwarte. FUEGO!!!

Soli, jetz geits no as Danke säge ☺

Mäsi → Merci viu mau für dini super, intensive u lehrliche Trainings, mir hei mängisch Zunge bei Fuss gha! ☺

Core → Merci für di Isatz aus Teamverantwortlechi, du hesch dä Job tip top gmacht.

Desi, Anita, Meret → Merci für öii Isätz und d’Ungerstützig für üses Team ir Rückrundi.

Üsem Sänger → Merci, är het üs jedesmau voremne Mätsch uf boue u Chraft gä.  
Giorgio Moroder, Reach out for the medal (Olympia-Song 1984)!!

Äs big FUEGE

D2